



Timmisartuutileqatigiiffik Air Greenland nunatta tamakkiisumik pigisariaqarneranik, imaluunniit nunatta piginneqataassutaasa, 37,5 %-iusut, naalagaaffimmut imaluunniit SAS-imut tunineqarpata, taakku arlaat nunatsinnut imminut akilersinnaanerunersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Anthon Frederiksen, Partii Naleraq)

Nunatsinni pigisat nalillit aqunneqarneri, kiisalu suliffeqarfiit inuiaqatigiinit pigineqartut aqunneqarnerminni, annertunerusumik inuiaqatigiit pisariaqartitaat aallaavigalugit ingerlanneqarnissaat, nunatsinilu amerlanerussuteqartunut aningaasarsiornerit igut ikorfartuinerunissaannut aqqutissiuinermi iluaqutaanerunissaat anguniarlugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Per Rosing-Petersen, Løsgænger)

Demokraatini qutsavigaagut apeqquteqaat aallaavigalugu oqallinnissamik siunnersuuteqartut taakkulu pingaarnertut isigisagut tunngavigalugit oqaaseqarfigissavagut.

Maannakkut Ukiakkut ataatsimiinnermi siunnersuuteqarpugut Namminersortunngorsaanissamut Ataatsimiititaliarsualiortoqarnissaanut. Siunnersuut saqqummiupparput isumaqaratta pingaaruteqartoq sukkanerpaamik paasissallugu nunami maani pisortat suliffiutaannik ingerlatsinerput nutaamik eqqarsarfigissagaanni imminut akilersinnaassanersoq. Minnerunngitsumik pisortat annertuumik aningaasaliisarnerisa inuit tamarmik kissaatigisaannut aningaasarsiornerikkut namminiilernissatsinnut toqqaannartumik akorngutaasinnaanera pissutigalugu.

Aningaasarsiornerup imminut attassinnaasup pisariaqartippaa namminersortunik suliffeqarnissaa aamma taamaattumik namminersortuunerup ineriartortinnissaanut sinaakkutissat pitsaasut pilersittariaqarpagut aamma minnerunngitsumik sukumiisumik qissimittariaqarparput namminersorlutik oqartussat tamakkiisumik ilaannakoortumilluunniit ingerlatseqatigiiffiutaasa ilaat iluaqutaasumik namminersortunngorsarneqarsinnaanersut.

Taamaattumik aammaarluta inimi maani partiinut allanut kaammattuutigeqqissavarput tapersersoqqulluta namminersortunngorsaanermut ataatsimiititaliarsuarmik pilersitsiniarluta kissaateqarnitsinni taamaasilluta uangut aalajangiisartut pitsaanerpaanik sakkussaqaarniassagatta nalilersuinissatsinnut ilumut iluaqutaasumik namminersorlutik oqartussat ingerlatseqatigiiffiutaasa ilaat namminersortunngorsarneqarsinnaanersut.

Tamatuma saniatigut aammaarluta partiit socialistiskiusut kaammattorusuppagut ingerlatsivinnik sapinngisamik amerlanerpaanik namminersortunngorsaaqqullugit. Unammilleqatigiinneq



naggataatigut atuisussanut tunisassianik akikinnerusunik pilersitsisarpoq taamaasillunilu innuttaasunut iluaqusiisarluni. Ajoraluartumilli akulikippallaamik takusarparput partiit socialistiskiusut killilersungaangitsumik niuerfissanik pilersitsinissamut soqutiginnineq ajornerat. Kingullertut assersuutigisinnaavarput oqarasuaatinik angallattakkanik atuinermi kiffartuussinerup namminersortunngorsarnissaa pillugu aalajangiineq kingulleq uangut isumarput naapertorlugu kukkusoq, naak arlaannaannulluunniit attuumassuteqanngitsup nalunaarutip naqqissuseraluraa, namminersortunngorsaaniisaq atuisartut akikinnerusunik atuisalernissaannik kinguneqartussaq inuiaqatigiit aningaasarsiornerannut annertuumik iluaqusiissasoq.

Air Greenlandimi piginneqataassutsinik nioqquteqartalernissaq pisisalernissarlu pillugu tigussaasumik apeqqutigineqartumut tunngatillugu Naalakkersuisut akissuteqaamminni oqaatigisaannut naleqqiullugu allaanerusumik oqassalluta tunngavissaqanngilagut.

Taakkuupput oqaaseriumagallakkagut oqallinnermi qilanaarpugullu oqallinnerup ingerlaqqinnerani peqataanissatsinnut.

Justus Hansen